

四庫全書

集部

欽定四庫全書

集部

于湖集卷八

一至

詳校官起居注主事臣顧宗泰

主事臣呂雲棟覆勘

總校官知縣臣楊懋珩

校對官中書臣高 中

繕錄監生臣吳 濬

欽定四庫全書

集部四

于湖集

別集類三 宋

提要

臣等謹案于湖集四十卷宋張孝祥撰孝祥字國安歷陽烏江人紹興二十四年進士第一孝宗朝累遷中書舍人直學士院領建康留守尋以荆南湖北路安撫使請祠進顯謨閣直學士致仕事跡具宋史本傳書錄解題

載于湖集四十卷此本卷數相合前有其門人謝堯仁及其弟華文閣直學士孝伯序堯仁序稱孝祥每作詩文輒問門人視東坡何如而堯仁謂其水車詩活脫似東坡然較蘇氏畫佛入滅次韻水官韓幹畫馬等數篇尚有一二分劣又謂以先生筆勢讀書不十年吞東坡有餘矣今觀集中詩作大抵規摹蘇詩頗具一體而根柢稍薄時露竭蹶之狀堯

仁所謂讀書不十年者隱寓微詞實定論也
然其縱橫兀傲亦自不凡故程史載王阮之
語稱其平日氣吐虹霓陳振孫亦稱其天才
超逸云乾隆四十六年十月恭校上

總纂官

臣

紀昀

臣

陸錫熊

臣

孫士毅

總校官 臣 陸費墀

于湖集序

文章有以天才勝有以人力勝出於人者可勉也出於
天者不可強也今觀賈誼司馬遷李太白韓文公蘇東
坡此數人皆以天才勝如神龍之天矯天馬之奔軼得
躡其蹤而追其駕惟其才力難局於小用是以亦時有
疎略簡易之處然善觀其文者舉其大而遺其細可也
若乃柳子厚專下刻深工夫黃山谷陳後山專寓深遠
趣味以至唐末諸詩人雕肝琢肺求工於一言一字間

在於人力固可以無恨而概之前數公縱橫馳騁之才則又有間矣故曰人可勉也天不可強也于湖先生天人也其文章如大海之起濤瀾泰山之騰雲氣倏散倏聚倏明倏暗雖千變萬化未易詰其端而尋其所窮然從其大者目之是亦以天才勝者也故觀先生之文者亦但當取其轆轤幹旋之大用而不在於苛責於纖末瑣碎之微先生氣吞百代而中猶未慊蓋尚有凌轢坡仙之意其帥長沙也一日有送至水車詩石本掛在書

室特携堯仁就觀因問曰此詩可及何人不得倭我堯
仁時窘於急卒不容有不盡因直告曰此活脫是東坡
詩力亦真與相輒但蘇家父子更有畫佛入滅次韻水
官贈眼醫韓幹畫馬等數篇此詩相去却尚有一二分之
劣爾先生大然堯仁之言是時先生詩文與東坡相先
後者已十之六七而樂府之作雖但得於一時燕笑咳
唾之頃而先生之胸次筆力皆在焉今人皆以為勝東
坡但先生當時意尚未能自肯因又問堯仁曰使某更

讀書十年何如堯仁對曰他人雖更讀百世書尚未必
夢見東坡但以先生來勢如此之可畏度亦不消十年
吞此老有餘矣次年公自江陵得祠東下方欲踐此言
未幾則已聞為馭風騎氣之舉矣嗚呼天不竟英雄之
志尚留莒墨兩城與太原餘孽至今江流尚覺有不平
其以此歟天下刊先生文集者有數處豫章為四通五
達之衝先是先生之子同之將漕於此蓋其責也時侍
郎莆陽蔡公屢勸之而竟不果信知斯文通塞亦自有

時今閣學尚書公自其開府以來即曉夕在念而尚乃遲遲至於今者豈不以先公後私於事自有次第而不知此事亦公也蓋四方學者渴見斯文以增壯筆端方皆以先覩為快使公肯為是舉正是嘉惠學者之意豈必獨認以為激乎鵠原之情而足以有歎哉自渡江以來將近百年唯先生文章翰墨為當代獨步而此猶先生之餘事也蓋先生之雄略遠志其欲闢開河洛之土疆復洙泗之鐘鼓者未嘗一日而忘胸中使其得在經

綸之地驅馳之役則周公瑾謝幼度之風流其尚可挹
於千百載之上也而門下之鯁生何足容議論之喙哉
嘉泰改元之中秋門下士昭武謝堯仁序

于湖集序

于湖先生長孝伯五歲垂髫奉書追隨未嘗一日相捨
別去餘十年先生再冠賢書會于臨安時紹興癸酉也
明年魁多士又明年入館寢登清華孝伯亦入太學為
諸生無時不在左右每見於詩於文於四六未嘗屬橐
和鈎舒紙一筆寫就心手相得勢若風雨孝伯從旁抄
寫輒笑謂曰錄此何為從手掣去良由天才超絕得之
游戲意若不專以文字為事業者一日謂孝伯曰汝作

一月工夫我只消一日明日便有用處夫所謂用者豈章句而已哉惜乎天奪之速不容究其才於用大僅能遺愛於六州恭聞孝宗皇帝玉音嘗興用才不盡之歎使其適乘機會必有以上契聖心則其成就蓋不止此嗚呼大夫士有志當世孰不以功名自許至如先生真有過人者歟別後詩文多得之耳授然不能無舛也揭南昌解后王大成集大成從先生久先生深愛之者盡以家藏與諸家所刊屬其讐校雖不敢謂全書然視他

本則有間矣繼有所得當為後集云嘉泰元年十月旦
弟華文閣直學士朝請大夫知隆興府充江南西路安
撫使孝伯謹書

欽定四庫全書

序

欽定四庫全書

于湖集卷一

宋 張孝祥 撰

賦

金沙堆

洞庭之野吞楚七澤乘秋而霽天水一色登高梔以掛
席分插余舟之兩翼凌長風以破浪兮駭掀舞於一葉
橫中流而北望兮何黃金之突兀觸白日以騰耀兮疑

波神之沉宅舟人告余曰此金沙堆也壁立千仞衡亘
百步靈鰲之背孤起以自暴兮棄方丈而不負湧青城
之玉局兮遲虛皇

一本作
靈皇

而來下太倉露積以弗校兮

白粲粲而非腐熒海波以出素兮莽既多而無數胡山
十丈之雪結而不復釋兮吳江八月之潮來而不復去
諒非目見而心識兮雖巧譬其焉喻客有嘆曰鑿土為
城隱以金椎一雨之暴或傾以摧之今此沙也質輕而
性離得水而走得風而飛澶漫乎大漠之北飄流乎崑

丘之西曷稽天之巨浸兮獨與此而相宜廉隅峻以特
起兮若斗之覆而四維濇盡不為之高兮春既漲不為
之卑風揭石以拔木兮蛟鼉駕海而上馳捲近岸之丘
阜兮若烈火焚乎枯萁謂此沙既無有兮當散入於渺
瀰旦起而視之兮曾無毫髮之或夷豈與息壤同生兮
為上帝之所私將富媪之多藏兮萬寶萃而在茲豈女
媧五色之石兮完天漏之所遺將神禹治水兮聚九野
之土以補東南之虧豈劫火之灰兮歲既久而莫移將

神龍之攸居兮百鬼夜築而守之徵至理而莫得兮願
先生之予思也張子笑之曰子來前天地之間何所不
有遠者莫諱近或可取今夫積水為冰及春而漸此物
之常理也然凌人氏乃得而藏之堅其土使地氣無所
洩厚其覆使天氣不得下天且暑矣於是方謹而獻之
夫以一人之私猶能變易陰陽之度而況天地之大乎
沙之積不積流不流安所置論子行矣

辭

攻蚊

后皇嘉生物有羣此強者熊虎弱羔羶此畜我遠我區
以分些各保性命不相紛些爾獨何化以為蚊些匪強
匪弱孰使云些廉纖么麼毒所熏些利喙短翼飛翁翁
些羸腹曲脚豹成文些藏陰伏翳須日曛些微類嘯族
乘惡氛些渙散揮霍絲之棼些緣頭撲臂來如雲些入
隙伺罅霰雪霧些伊伊湔湔相懽忻些嗜膚吮血飽以
醺些前捷甫去後亦厪些無可柰何夕及昕些引鏡自

照面纈紋些客或告我祈火君些彼嗜臭惡憎芳芬些
謀野則獲采蕭薰些載暴載藝烟細縕些儻不退聰秉
烈焚些如彼即墨殲燕軍些焦腸爛腹翅羽旣些舉徒
盡殪永不聞些涼宵大枕奏厥敷些宜其不仁我則懂
些當斷不斷露汝筋些

祭金沙堆廟

愴九秋之半兮絕洞庭予將歸登磊石以遐矚今天水
莽而相圍鯨波浩其呼洶兮蛟鰐擇食以自肥盲風憑

怒無時期兮橫中流吾馬依舟人諗余以湖君之神靈
兮曰甚仁而又威若著龜之可信兮盍潔齋而致祈嗟
余禱之既久兮豈夫神今日之我違晨光杲其東升兮
破積霧之霏微凝秋霽之萬頃兮檣烏轉而北飛棹夫
集合以奏功兮若駟馬熟路而駢駢寄千里於一瞬息
兮才舉手而一揮如靈宮以午泊兮目眩積沙之輝隨
波濤以上下兮爰金城之巍巍信真仙之攸宅兮羗見
聞之所稀粉牆行樹繚以直兮鋪首鳴其朱扉儼帝服

之中居兮亦班寵于厥妃來牲酒之雜還兮紛滿堂之
芳菲懷沙大夫之侑食兮噫孰知其是非鳥喙魚服沙
鰭鯀鯉睚眦以列侍兮駭怪譎之裳衣葢專制楚之七
澤兮實參握乎天威者也由余役之既久兮闕水菽於
庭聞瞻白雲以延望兮朝躋至乎夕暉苟利涉以遄達
兮豈妄福之敢希感神貺余以獨厚兮銘肺一本作臍膺而
三歎跪陳辭而侑觴兮聊彷彿其音徽

頌

壽芝頌代揔得居士上鄭漕

并序時年十九作

上既專任一德方內底定眷江之北昔為戰墟生聚教訓十年于茲矣曰疇予寶臣持節以宣弟德惠為予撫綏之百辟卿士再拜言漕江東臣某再考績為天下最宜可上曰俞哉於是有詔華原增秩揔部淮南十有六州詔下之日淮民歡呼奔走相告自州達之縣自縣達之田里自田里達之窮巖幽谷公江東之治仁聲義氣漸被於兩淮故淮民間公之來其善如此越翌日歷陽

郡東鄙樵民有得異草於松根者郡人張某寔公門下
士屬公誕辰甫及當有頌詩形容盛德迺以九月吉旦
潔齋執筆為文未有緒俯而假寐若有告者曰姑置之
天將以芝畀女為公壽某驚悟已而樵民奉芝歛門曰
疇昔獲此弗之識而神夢謂余是蓋所謂芝者天以華
原公將持節吾土是生靈物而為瑞且此月之十日則
公生之日是芝則又昭示公難老之徵若里人有張氏
者實公客亟歸之俾得獻公不者禍女神言如是我懼

是以來某亦解昨者假寐若告之言盛服再拜而受之
信芝也一本二幹高廣有咫堅密溫潤色如紫玉輪囷
蓊鬱駢為七枝華葉敷芳則十有四藹然若卿雲捧日
燦然若奇葩豔春噫戲異哉未曾有也神之命公可謂
深切著明矣不知天之於人相去遠近而其物類之感
召如是其敏且速耶且以公將持節西州而為呈瑞則
胡不降甘露流醴泉異畝同穎鳳皇翔集耶不以是數
者為應而應以芝天意若曰芝上瑞也不春而華不秋

而實不根而植翦而置之雖歷數千百年而猶敷腴充實則芝非特上瑞又壽草也天與公瑞則余除命之後瑞草發於淮西之境天與公壽則生朝之前壽草產於古松之下物像昭顯決非偶然者鄉惟甘露醴泉嘉禾翔鳳之來謂之祥瑞則可矣烏在其為壽徵也於以見天之錫公富貴壽考廣大繁昌有永無極豈兩淮之民獨受其福將天下生靈寔受其福豈公獨有其瑞將朝廷國家寔有其瑞然則此芝之來所繫大矣哉謹拜手

稽首而為之頌曰

濯濯靈芝施於古松天錫珍祥以壽鄭公文武鄭公其
德孔碩文正之子柔嘉維則天子命公汝予寶臣宣力
四方其牖我民公拜稽首奉天子命自西徂東惟一其
政孰寒而飢公衣食之孰癘而疵公藥治之孰獷不率
則訓則治孰姦賊民則耨則夷條疎節披罔亦不宜天
子命公汝有成績盍其歸矣箴補袞職淮堧奕奕其疆
千里奠國北門孰與予理在列咸咨曰公克任天子命

公輟女往鎮公來之初靈芝則生亦以壽公寵錫百朋
蔚彼芝矣厥生孔時爰發其祥以公來綏蔚彼芝矣公
介眉壽數百千祀與國長久神則有言芝以瑞公入侍
帝旁九旒升龍神則有言芝以壽公楚南春秋綠髮方
瞳我作頌詩式昭罔極誕保休徵有永無斁

樂章

降神

於神何司而德於木肅然顧歆則我斯福我祀孔時我

心載祗匪我之私神來不來

又

神兮焉居神在震方仁以為宅秉天之陽神之來矣道修以阻望神未來使我心苦

又

神在途矣習習以風百君後先敢一不恭奔走癘疫祓除菑凶顧瞻下方消搖從容

又

溫然仁矣熙然春矣龍駕帝服穆將臨矣我酒清矣我肴烝矣我樂備矣我神顧矣

升降壇

在國之東有壇崇成節以和樂式降式登潔我珮服璆琳鏘鳴匪壇斯高曷妥厥靈

青帝位奠幣

物物熙熙胡為其然蒙神之休乃莫報旃有卽斯珪有量斯幣予以奠之格此精意

太昊位奠幣

卜歲之初我迎春旗孰克侑饗曰古宓戲於皇

後闕

于湖集卷一

欽定四庫全書

于湖集卷二

宋 張孝祥 撰

古詩

和何子應賦不欺室韻

隆興天子開千齡六龍飛天動潛鱗東嘉先生初召對
不欺之論驚廷臣誰令浮雲蔽白日脫幘歸來環堵室
巍巍烏府憶霜簡凜凜螭坳有椽筆魏公眼力無餘子

與公周旋豈其死請公細讀不欺銘一字之褒如魯史
讀中興碑

繡紉兒啼思塞酥重牀燎香薰麝蕪阿環錦韞無尋處
一夜驚眠搖帳柱朔方天子神為謀三郎歸來長慶樓
樓前拜舞作奇崇中興之功不贖罪日光玉潔十丈碑
蛟龍蟠舞與天齊北望神臯雙淚落祗今何人老文學
題張仲欽所藏隆茂宗畫登瀛圖

老隆已死畫筆枯畫歸天上人間無公從何處得此圖

明眼嶺海三嘆吁天策上將天為徒指揮羣龍清八區
褒鄂英衛供掃除功成告廟金糝糊歌童舞女不願渠
乃此數士相為娛鐵面苦口談詩書直欲措世如唐虞
老隆妙手神所摹蒼頭廬兒亦敷腴祝公歸直承明廬
願持此道補帝裾

題蔡濟忠所募御府米帖

生前官職但執戟身後一字萬金值當時雷霆不收拾
世間不復有遺逸上清虛皇手自擇編星為囊雲作笈

流鈴擲火守護密君從何處見真跡知君定通玉帝籍
太微垣中賜餘墨龍騰虎卧摹不得想君神授五色筆
江南鈎鎖腕中力釵折屋漏千態出整整十卷字猶濕
光彩激射海為立平生我亦有書癖對此懍怵心若失
口呿汗下屢太息十日把玩不得食作牋天公拜稽首
乞我此老生時一雙手為君痛飲百斛酒墨池如江筆
如帚一掃萬字不停肘

賦王唐卿廬山所得靈壁石

湘江竹深韶不傳后夔神禹飛上天泗濱之磬無人編
帝敕此寶淪深淵於乎不知幾千年奇形異質鬼所鑄
青虬赤虎遭縛纏虺筋怒爪身攣拳自從風塵障中原
神物變化隨霏煙金聲玉振義不辱六丁徙置康廬巔
靈臺星官未知處但恠寶氣干霄躔王郎齋居粵淺原
飲水泣血天所憐空山無人下羣仙似夢非夢或告旃
捫蘿獨上果有得失喜而懼心茫然百夫挽取自包裹
解衣更買蠻兒氊絨扃不肯鄉人說知我好古容觀瞻

焚香再拜屢歎息安得致之天子前安得致之天子前
明堂郊丘備宮縣調和正聲薦上帝簫勺羣慝收戈鋌
朝廷清明用者哲一律四海歸陶甄鳳皇來儀獸率舞
復古却到虞韶邊是時賦公筆如椽襍牋為草登歌篇
月之四日至南陵大雨江邊之圩已有沒者入
鄱陽境中山田乃以無雨為病偶成一章呈王

龜齡

圩田雨多水拍拍山田政作龜兆拆兩般種田一般苦

一處祈晴一祈雨去年水大高田熟低田不收一粒穀
只今萬錢糴一斛浙西排門煮稀粥聖神天子如堯湯
曰雨而雨暘而暘天公廣大豈有意爾自作孽非天殃

近得一二硯示范達甫笑以為堪支牀也許送
端州大硯作詩以堅其約

范郎紫玉餘半圭翻手作雲雨電隨龍蛇起陸孔翠飛
雲收雨霽千首詩薦以文錦盤珠璣夜光發屋隣翁知
桂州刺史書成癡單車萬里日夜馳囊中已無去年錐

欠此石友相娛嬉范郎笑我支牀龜忽遣致我重寶齋
金印如斗不願携愛此直欲忘朝飢君行題輿古端溪
溪石醜好紛不齊溪邊之人足謾欺須君眼力為辨之
更作萬斛之墨池為君大書十丈碑

劉倅示崇寧上舍題名翰林其父也

崇寧天子開皇極發揮神謨詔羣辟十八學士天與力
攀鱗附鳳才一日翰林尚書古遺直不作三公奄寔宥
當時盛事刊樂石後五十年已今昔令我再拜三嘆息

尚有之子似世德不羸其躬且赫奕

黃升卿送棕鞋

編棕織蒲繩作底輕涼堅密穩稱趾帝庭無復夢絲絢
上客還同貺珠履我家江南山水窟日日行山勞屐齒
感君投贈欲別時布襪青鞋從此始亨衢知子方着脚
直上雲霄三萬里泰階厯盡却歸來赤舄一雙應几几

贈張欽州

張家承平四姓侯門前列戟金成丘南來清貧家立壁

但有萬卷書滿樓雲山極觀半空寫下有花竹秀而野
閉門讀易已三年樂天知命忘華顛我行湘中識此老
難兄莫年更枯槁從來戚晚須表勸會聽鳴珂趨朝早
衡陽小隱雖深幽去天尺五君無留貂蟬堯鰲何足道
君必不為猿鶴羞

賦沈商卿硯

石渠東觀天尺五壁星下直圖書府琳琅寶鎮出三代
浩瀚簡編照千古右文儲硯一百九鈿匣珠囊護瓊玖

有時清夜發光怪諸儒縱觀容拜手一收朝蹟歸故園
瓦池葦管塗突煙夢尋清都故厯厯起凭書按空潜然
眼明見此超萬石色如馬肝涵玉質白圭之玷尚可磨
溢不拒筆滑留墨摩挲太息不自己呼兒汲甘為湔洗
天遺至寶瑞吾子要與詞林壯根柢子行飛騫為時須
西清承明有佳除收功翰墨儻乞我田間自抄種樹書

大雨呈同行諸公

我舡千斛初甚遲上灘下灘風薄之百夫撐挽才得過

水淺舟大行無期同來賓客笑鈍滯一葉自買如鳬鷖
瞥波急漿亂藻荇瞬息不見颿車馳忽然昨夜雷雨作
黑雲頽山風卷壑龍門春漲魚鼈亂牛渚宵明鬼神惡
蓬飜纜斷泊不得客只一身無處着長年絕叫客驚起
一浪先掀半舡水囊衣漂盡到巾屨一夜奔忙沙石裏
我時甘寢殊不覺但怪颼颼風到耳起來呼酒自勞苦
水蒲涼生差可喜鄉來笑者今却悲人生淹速那能知
明朝轉柁我舡快喚客同舡莫嫌隘

吳城阻風

吳城山頭三日風白浪如屋雲埋空北來大舸氣勢雄
車帆打鼓聲辭辭我舡政爾不得去跼促沙岸如鳬翁
長年三老屢彈指六月何曾北風起由來官儂多齟齬
世不汝諧神亦爾我愧此言呼使前順風逆風皆偶然
皇天廣大豈有意想汝嗔喜庸非偏瓶中有粟囊有錢
與汝飽飯姑留連

金沙堆

玻璃盆中金作堆
葯房桂棟中天開
洞庭無底蛟蜃惡
君不喚我那能來
旁舡守風四十日
我行昨夜到磊石
山頭望君乞杯琖
僮僕歡呼得頭擲
二更南風轉旗脚
打鼓開舡曉星落
秋光淨洗八百里
亭午投君廟前泊
斬牲釃酒報君德
君今清都豈其食
聊須醉飽撐舡儂
明日依舊行南風

欲雪

欲雪未雪天模糊
凍行沙尾鷓鴣呼
北風刮耳立不住

更騎鉞馬穿枯蘆兩生憐我意不舒江頭三日占檣烏
高堂明朝置安輿買羊沽酒償勤渠

鑑湖納涼

鑑湖周圍三百里極目平波清到底荷花歲久生滿湖
人來採蓮唱歌起賀家千頃水雲鄉六月荷花風最涼
短楫輕舟來斷續山橫曉月正蒼蒼

和沈教授子壽賦雪三首

北風吹來燕山雪十萬王師方浴鐵風纏熊虎靈旗靜

凍合蛟龍寶刀折何人夜縛吳元濟我欲從之九原隔
東南固自王氣勝西北那憂陣雲結豈無祖逖去誓江
已有辛毗來仗節

又

今年米貴更風雪破屋荒涼冷於鐵道人三日不出門
卧聽敲簷竹枝折高吟忽送三十韻靚面未覺千里隔
此公也自可憐人家徒四壁衣鶉結君不見漢時蘇子
卿窖中蓄甕終持節

又

天公作劇已三白刮面東風利如鐵只今斗米錢數百
更說流民心欲折邊人打圍涂塘北煙火穹廬一江隔
陛下宵衣甚焦勞微臣私憂長鬱結爾曹忍凍不足說
我輩何時立奇節

鄱陽使君王龜齡閔雨再賦一首

老農歌舞手作拍一雨紛紛稻花折去年秋田旱政苦
使君隨車有甘雨旁州不熟我州熟至今中家有藏穀

地碓舂秔珠滿斛老農左餐仍右粥使君行矣伊佐湯
緝熙和氣無常暘豈徒一雨潤九穀要為萬物除干殃
喜晴賦呈常守葉夢錫

使君憂民出至誠欲晴未晴天所矜白衣老人無逢迎
香火未收東方明指揮六龍扶日行羣陰卷盡見太清
女擷柔桑男趁耕熙熙和氣滿春城去年歲事已如許
田頭試聽老農語淞西更着五日雨麥根爛盡種不土

七夕

去年永州逢七夕今年衡州逢七夕往來不敢怨道路
迎送但知慚吏卒年年七夕有定時我行屬天那得知
東西南北會逢汝但願強健無所苦

謝劉恭父玉潭月色真石室之賜

玉潭月色列以清石室千里猶典刑何人遺我雙玉瓶
武夷先生翰林卿約束風雨驅雷霆長鯨夜吸川為傾
明朝風止醉不醒扁舟徑度君山青

從張欽夫覓紙

蜀江擣麻色勝玉，百金才能致一幅。
君家入則充棟宇，再拜未肯乞纖粟。
為君破慳作此詩，擔囊揭篋應有時。
比鄰寒亡忌唇齒，君但勤渠送川紙。

幽興

海涵大陰日西墜，畫角一聲城欲閉。
柴門關上濯足眠，萬事不如高枕睡。
睡鄉廣大能我容，兀兀騰騰興莫窮。
推枕起瞻河漢曉，月明庭竹響清風。

于湖集卷二

欽定四庫全書

于湖集卷三

宋 張孝祥 撰

古詩

麒麟硯滴分韻得文字

素王西狩麟筆削昌斯文茂陵一角獸妙語間終軍壯
哉筆硯間英姿欲拏雲名參龜龍瑞威掃狐兔羣豈獨
濡毫端政爾清塵氛會當獻君王玉殿春夜分輸寫宵

中奇恩波被無垠

諸公分韻躡冒頓之區落焚老上之龍庭得老

庭字

橫梁能賦詩下馬具檄草忠義乃天賦勲名要時早龍
卧南陽客鷹揚渭濱老當其尚棲遲衆或輕潦倒風雲
會相遇氛祲當獨掃鳳皇翔千仞駕馬顧棧阜士為一飽
謀懸知不同道

又

吳甲組練明吳鉤瑩青萍戰士三百萬猛將森列星揮
戈却白日飲渴枯滄溟如何天驕子敢來擾典刑嗚呼
三十年中原失翰屏陛下極涵容宗祊甚威靈邊氓爾
何知不靖心未寧囊血規射天蒼蠅混驚霆佛狸定送
死榆關不須扃彼勢看破竹我師真建瓴便當收咸陽
政爾空朔庭明堂朝玉帛劒佩鳴東丁八章車攻詩十
丈燕然銘我學益荒落尚可寫

一本作紀汗青

椰子酒榼

獐人生南方託家碧山崖採擇供貢篚扶持上天街愧
此愿慙姿欲售久未諧道傍麴先生風味故自佳蓬渠
即傾蓋輸寫能開懷刮削出光彩規繩去歌佞金玉豈
足貴膠漆真吾儕客來有嘉招二士往必偕婆娑止坐
隅供饋煩金釵獐人雖木強醇德真無涯虛心實其腹
居然外形骸微物幸見用棄置理則垂毛穎有封國陶
匏薦欽柴大藥起世病炮燭及根茲願予自洗濯勿受
塵埃埋暇日肯相從醉經坐高齋

赭山分韻得成葉字

昨日一尺雪今朝十分晴
杲日上積雪光若虹
氣升江平鏡新磨地迥
玉琢成赭山有令色
令我白眼青借馬
屋東家喚客踏層冰
冒貂挾裘茸石路五里平
竹樹紛掩冉珠幢間霓旌
野僧不慣客倉皇門前迎
屋古少完壁堂虛有危
登石上迹宛宛山腰塔
亭亭却火偶不燒百年費
支撐我有一尊酒高處得
細傾諒非無事飲憂國
空含情長歌眇寥廓歸路
已戴星

又

萬生紛不同宿昔有定業哀哉彼遷民苦事乃稠疊
累庭際炊采采澗底葉問渠胡為來悲淚不盈睫連年
避兵亂生理安可說今年更倉皇芻藁亦焚劫扶持過
江南十口四五活斗米六百錢兼旬又風雪前時詔書
下振廩要周浹聖主甚哀矜我曹空感咽願今兵革罷
復得理歸楫傳聞菰蒲中相殺血新喋本是耕田農飢
寒實毆脅須公語縣吏早與支米帖

重入昭亭賦十二韻

我本山中人对山，
輒忻然蹉跎落世網。
欲去常拘牽，蒼鷹着珠鞵。
側腦思高騫，青絲絡奔驥。
擺脫意乃便，抑鬱不自聊。
沉冥向誰宣，長懷昭亭山。
積翠摩青天，下有千柱宮。
突兀數百年，往者雪中游。
羣峯玉回旋，飛閣出木末。
下睨春無邊，堂中二老人。
龍象開法筵，炯炯月在空。
浩浩海納川，應庵默無言。
妙處心已傳，如庵說千偈。
微辭諦真詮，靜極炷爐熏。
對床且安眠，更欲捐冠簪。
一簞

寄三椽此志竟不遂緇塵亂歸鞵今朝復何朝却望山
中煙縹緲見樓觀鍾梵聲清圓我携九節筇飛步雲蘿
巔

登馬氏永寧閣和朱漕元順分韻

佛宮昔誰營猶挾葢世氣應慚割據醜稍識苦空味重
簷隱白日隆棟湧金地耽耽壁間像尚可將千騎鄉來
歌舞處荒棘擁城雉惟此悲願成厯劫更興起橫撞鍾
萬石妙響警昏醉憶當風雪辰茲事實經始老僧喜成

就膜拜顙有泚喚客饌伊蒲齋房頗深邃空巖才跬步
不往獨何謂徑携雙竹杖脚力勇難制繡衣兩使者風
誼我所畏相逢瘴海上此樂豈天惠山林與心會風月
可回施聊乘簿書隙拚此一日費摩挲水邊石勝處欲
專美不用濡漆書公詩即行記

再用韻呈仲欽元順

今時朱仲欽文字有奇氣潛幽覩天奧雋永得古味袖
手閱世紛虛心餘樂地那持瘴野節不從羽林騎埋輪

吾宗英補袞五色雉去年對延英御坐再三起憂民甚
已溺稽古乃心醉天衢行日月發軔從此始會當紀鴻
業我筆墨先泚相期並徵詔禁殿直清邃尚憶此追游
班中語相謂我懷江湖去初服反芟制閑邊靜成趣岐
路險多畏此事屬兩君它年儻終惠長篇起予病妙語
充法施調高和難工初學慚紙費郊原春無數風日極
清美已遣具方舟重游更須記

贈江清卿

吾友林少穎讀書不計屋抄書手生繭照書眼如燭往
時羣玉府上直對床宿夜半聞吾伊我睡已再熟此君
抱高節雪栢映霜竹造物乃兒戲卧病在空谷尚能作
手書寄我成一束我懶更愧渠終歲不報復今來見江
子少穎儼在目不必不如師惟子肖甚速持身嚴法律
自愛比冰玉學官冷徹骨三月食無肉危坐談仁義口
吻若布穀時能從我游騎馬踏溪淥定自我輩人胷次
不碌碌惟皇開洪業大厦非一木豈有梁棟姿而今久

淹辱願子益寵珍即日馬首北我懷山林去掃迹混樵
牧躬耕得薄少持用供水菽稍遠聲利場真勝萬鍾祿
但恨與子別醉語成諄複因書寄少穎以寫我心曲

和蔡濟忠天字韻

憶我初識君屈指今七年鹽車着騏驎駕蹇紛爭先謂
當對清閒帝席半夜前稍使修世官復近尺五天如何
尚朱紱亦墮嶺海邊前山春色多佳樹午陰圓散策履
幽徑方州下長川心目得開明語笑為芳鮮但恨暝色

至不得窮攀援尚欲夜然犀下照蛟龍淵清遊渺灘繼
歸夢蒼山巔須君換鵝帖更叙山陰賢

考試呈周茂振舍人陳季陵國正

胷中五斗棘厭此十日讀紛然湘羅帕猶作春筍束先
生擇法眼一閱不再復探囊得至寶每出輒驚俗孟公
更超絕涇渭飽渟瀟從容了官事繭紙唾珠玉鄙夫聞
道晚衡鑑恐不足冥搜夜無寐慚愧費官燭何時即三
昧屈指社甕熟秋容日夕好應到堂前菊

和子雲白蓮

仙人玉步搖佛子白練衣新粧水底明素手風中揮
盈夜露光灩灩秋江肥寒月分好色朝霞借餘輝遙聞
功德水盡洗幻化非惟此妙花幢坐受諸天圍鄉來孤
山遊未覺所見稀零落塞草邊相逢故依依結實須及
早要令飽霜威采剝登君盤勿嫌此么微

與趙李二同年夜飲有懷石使君惠叔

佳月久不見忽見如故人清風何方來過我孤竹君我

有一尊酒政為二子斟會此風月宵更覺語笑新北城
石先生欲喚不敢頻坐上欠此客長懷渺無津南方鳳
之徒瑞世五色文鐵石賦梅花一洗瘴海氛臺家須貢
珍我欲列九閭且補諫官闕日酌白獸尊

金沙堆廟有曰忠潔侯者屈大夫也感之賦詩
伍君為濤頭妬婦名河津那知屈大夫亦作主水神我
識大夫公自托肺腑親獨醒梗羣昏聚臭醜一薰滌血
摧心肝懷裏如不聞已矣無柰何質之雲中君天門開

九重帝曰哀汝勤狹世非汝留賜汝班列真司命馳先
驅太一諏吉辰翩然乘回風脫迹此水濱朱宮紫貝闕
冠珮儼以珍宓妃與娥女修潔充下陳至今幾千年玉
顏凜如新楚人殊不知謂公果沉淪年年作端午兒戲
公應嗔

詠雪

東皇携春來屬車載霓裳回風作妙舞雜珮鳴珠璫千
官玉笋班再拜稱瑤觴酒罷各分瑞圭琮粲琳琅浩蕩

涵濡恩一笑徧八荒塵埃得湔洗焦枯亦輝光偉哉造
化力天地為翁張功成了不居杲日天中央

題朱元順浯溪圖

去年過浯溪王事有期程夜半度湘水但見天上星平
生中興碑夢入紫翠屏已辨北歸時十日窮攀登今朝
復何朝忽此短軸橫歷歷眼中見湘山無數青白雲著
山腰樓閣秋氣明便欲扶短策下濯滄浪纓主人山水
仙妙處心自評元顏骨已冷千載交益傾賞音寄幅紙

益見忠孝情題詩疥公畫託我不朽名

寄題向彥績使君采菊堂

使君天資高夙昔事幽屏長懷渺丘壑餘習謝鍾鼎東
籬義皇人槁死骨已冷淒其千載後妙處一笑領高堂
娛白髮兄弟極整整不須南陽泉壽與日月等

止酒

飲酒見真性此酒不可止一飲病三日止酒寧獲已飲
酒有別腸勸酒無惡意既因酒成病那識酒真味將軍

罵不敬次公醒而狂破面根觸人不如持空觴人言我
止酒似是遣客計但使客常滿客醉我亦醉

于湖集卷三

欽定四庫全書

于湖集卷四

宋 張孝祥 撰

古詩

昨日極暑今日極寒

昨日火流金今日風折膠昨着練布衣今衣弊緼袍赤
帝與玄冥凜凜隔一宵聊將擁爐適換此揮箴勞冰炭
欲盈懷炎涼不崇朝幻生過隙駒是身九牛毛等是一

寒暑胡為自談嘲萬法從心生心靜境亦消悟此本來
無絀綌同孤貂還當隱吾几試聽萬竅號

初得愛巖

高巖劃天門仄徑通乳穴隈堆青螺髻嵒嶸白玉闕外
有虎豹蹲中恐蛟蜃蟄東榮俯雷電西出挾日月萬壑
生悲風六月不知熱但覺駭心目未易紀筆舌平生山
水趣嶺海最奇絕洞府二十四未厭屐齒折晚乃得游
此餘地皆僕妾同來六七士嗜好頗相躡舉酒酌山神

慰汝久湮滅

與邵陽李守二子用東坡韻

兩李有佳句冰雪洒肺肝清越石在懸圓熟珠走盤我
家十二樓下俯千仞湍誰掣白玉瑣借與二子看臨風
度長蘆瘴海為清寒卻立望九州隘陋非所安便欲馭
長鯢九萬扶搖搏神山在吾牖弱水空瀾漫回首五千
劫不費一指彈絕笑塵中年攝提與涖灘

奉送李彥國還廬陵

李生來嶺南自挾書一束食簞寄蕭寺吃吃晝夜讀餘
子讓頭角文作翻手速小試不盡能它日真可卜里中
老仙伯曾對玉堂宿高節老彌厲名蓋斗南北掖垣我
畏友不愛萬鍾祿卷藏一丘下勲業所迫逐子歸問道
要儲作飢歲穀富貴偶然耳吾欲子金玉

暑甚得雨與張文伯同登禪智寺

老火陵穉金聚作三日熱舟行湘江上蒸煮到魚鼈黑
雲起東北一震山石裂不知雨來處但見風卷葉銀河

倚天瀉高浪舞飛雪只聽打蓬聲已覺涼意愜岸傍古
佛屋樓殿頗嵒嶮不辭衝泥去一看雨脚闊吾宗紫巖
客窮苦志不懾自我來浯溪奔走已旬浹我懶久廢學
愧子來挈挈相携得偉觀為子熾然說願子領話頭吾
今指標月

丙戌七夕入衡陽境獨游岸傍小寺

七年暑中行道路萬里賒今夕已七夕我猶在天涯繫
舡蒼石根人影散晚沙上岸是修竹仄徑如行蛇茅屋

四五間往昔佛所家經禪劫火盡舊觀初萌芽墻疊古
瓦盆僧披破袈裟喜間拄杖聲掃地自點茶何以為我
娛冰雪汲井花一洗十日渴分涼到童髻盈盈牛女期
不着雨洗車踈星銀漢動新月玉鉤斜更呼老奚官卷
蘆作鳴笳莫驚潭中龍聊起棲樹鷗

福嚴

丙戌七月

行行山益高所見益以奇煮茶南臺寺更上千級梯道
傍古時松閱世心已灰不與歲月競况受霜雪威路回

聞鐘聲寶刹隱翠微排空寫金碧剏石著拱枅門前堦
率橋劫火昔所遺神龍厭庠陋一炬然枯萁譚笑舊觀
還殿柱百尺圍老禪七十餘高與此山齊大屋貯龍象
空巖走金犀齋盂細細參至味無鹽醢頗聞三生藏中
有萬寶齋佛牙舍利湧貝葉旁行稀剖蚌慈相尊破匣
血縷飛稽首所願觀為洗往昔非却尋上山路擬看浴
日池急雨忽留人吾其少須之

湖湘以竹車激水秔稻如雲書此能仁院壁

象龍喚不應竹龍起行雨聯綿十車輻伊軋百舟櫓轉
此大法輪救汝旱歲苦橫江鎖巨石濺瀑疊城鼓神機
日夜運甘澤高下普老農用不知瞬息了千畝抱孫帶
黃犢但看翠浪舞餘波及井臼春玉飲配乳江吳誇七
跗足蠶腰背僂此樂殊未知吾歸當教汝

贈黃司法

吾友黃升卿乃是天下士阿翁苦硬節御坐留諫紙辛
勤教其子不但為科第一官法曹掾整整老胥忌吾行

桂嶺南所得但吾子願渠自愛惜窮達初不計功名儻
來耳期子以千歲

宵征

畏暑倦長道呼童戒宵征三更渡前溪溪水清且鳴舟
人自相喚炬火如疎星俯視亂石多仰見北斗橫微微
白露下磔磔宿鳥驚竹輿出林薄十里月漸明光采散
草木涼意侵冠纓

汎湘江

十日行湘江湘水清而溫不療亭午渴却憶土井渾道
傍古剎竿着屋高樹根飛泉出山腹甘冷水瓶盆何止
解百憂一洒塵埃昏設供者誰與稽首兩足尊

上封寺

七月十五夜我在祝融峯與世隔幾塵上天通九重手
取白玉盤納之朱陵宮羣山羅豆登萬籟酣笙鏞盡酌
五湖水勸我酒一鐘為君賦長言寫向西北風

一作為君長言

謠寫向
東南風

岸傍偶得木犀

天公不求金富媪不復藏居然土同價散作草木芳英
英園中葵一心傾太陽采采籬下菊令汝壽命康惟此
木之犀更貯萬斛香雄姿傲霜雪鱗甲森青蒼三賢鼎
足立正色凜相望豈比桃李徒紅紫紛披昌聊息貪者
心來上君子堂歲晚從我遊真汝兄弟行

王弱翁與余相遇漢口賦古意贈別

我舡行荆江厭此江水渾北風知人意引着清漢濱漢

濱有佳人心與漢水白涉江弄秋葉喚客踏明月明月
永相望佳人不可忘期君以千年珮我明珠璫

贈朱遠遊

遠遊何方來
峩峩古衣冠
袖中三百篇
貯月白玉盤
溪清石瀨急
雪凍銅壺乾
有如山澤仙
外瘠中氣完
便合朱絃彈
細着青瑤刊
懷哉人未識
飛步江風寒

和張欽夫尋梅

寒梅本無心
適與春風期
孤根擢歲晚
桃李更媚之
取

我碧玉壺薦此白雪枝故人不可寄耿耿空自竒故人
隔湘江獨立知者稀采香正滋蘭忍饑不食薇桴舟許
過我此約不可違江南煙雨村願與子俱歸

黃龍侍者本高覓詩

高禪本儒冠誰令着伽黎勞渠千里來贈我一卷詩句
法有源流人物乃清苦不用追九僧政須越諸祖君家
寒巖師今代僧中龍持此送君行更去問乃翁

題濁醪賦後并序

仇君在長沙未嘗出門養丹火三十年不惜分人
屢起死又善釀山東酒李卿寶文所為賦濁醪也
此軸留余所半載其猶子洪自長沙來荊州求跋
乃書一詩併歸之幸呈似南軒先生或肯同作

仇公昔釣璜乃得丹竈術閉門養真火鑪甕釀新秣酒
熟分四鄰丹成活千人窮巷不改樂一室長如春我知
酒中仙歲晚當得度乘雲見東皇請誦濁醪賦

屢登橫舟欲賦不成阻風漢口廼追作寄趙富

文楊齊伯

已過漢陽岸却望橫舟山秀色挹不盡西風將夢還我
昔登橫舟最愛漢陽樹橫舟今不見樹色只如故公舟
在青冥我舟一浮蘋闌干試拍手我亦同舉酒

棲真寄南康錢守

憶昔姑蘇臺實與君子別一別已六年音書間何闊我
行半天下塵土汙須髮君亦抱艱棘衣袂洒清血今日
復何日相望一山隔我領通玄府乃在廬山北君宦山

之南兵衛森畫戟無由接杯酒但可共明月作詩付郵
筒聊復寄消息

黃子餘自海昏見予於九江欲行為賦此詩

昔我初識君乃在潯陽城卻數已十年此地還見君積
雨楚水高落日淮山明我病不舉酒何以娛佳賓我行
不可留明復與君別悠悠千里情還當付明月

勸范東叔飲

今代太史公四海范氏門斯文十世澤斑斑被諸孫我

識叔西父白玉比粹溫今來見令弟俊氣百馬奔一第
溷子耳勿愧而家尊臨分無多言更酌老瓦盆

留題彭澤故縣修真觀

五月間修途今日一百里莫投彭澤縣愧此邑中士古
觀官道傍借榻暫少憇折腰向道士乞我五斗米聊為
奴僕飯明日更早起

一本作借榻客少休高
林度清風似為客子謀

湘中館

雲去月在沙潦淨秋滿川北斗掛落木西風送歸船去

年過湘中夜半投馬鞭篝燈洗塵土所見只屋椽雞鳴
問前途殘夢兀擔肩那知闌干外有此山水妍微微清
露溥稍稍明河偏孤光耿自照靜極忻所便身世兩悠
然吾其遂飛仙

中隱

吾家中隱君才比萬斛泉短小精悍姿一劍當雄邊去
年柳州賊俯視衡嶽顛君從襄陽來孤忠作戈鋌譚笑
百雉安淨洗湖嶺煙謂當醺王勲金印如斗懸言歸遽

如許此意誰為宣小隱即居山大隱即居廛夫君處其中政爾當留連早晚有詔書喚君遠朝天欲為中隱遊更著三十年

贈師永錫併簡子西文潛

永錫西方來持論乃據正健飯不飲酒自詭作縣令我已識淮父但未見伯渾林林三珠樹知是難弟昆上方顧中原有君但無臣宜有千里足而令走跋跋願子徑入關請對通明殿此事定在我不必問和戰

于湖集卷四

欽定四庫全書

于湖集卷五

宋 張孝祥 撰

古詩

萍鄉境上有驛傍有老杉餘百本余過而愛之
驛無名余名之曰愛直而為之詩又以告邑大
夫趙君公廩曰使繼自今為令者幸如君之賢
也則此杉長存不然將斧斤斯民以自封植於

杉何有

此杉已百年林立官道側鬼神所訶護斤斧不敢迫愛
此遺直姿凜凜有正色未云支大厦聊以蔭行客作詩
調令尹為我驛壁刻但使杉長存懸知令清白

遊千山觀

朝遊七星巖莫上千山觀東西兩竒絕勢略嶺海半長
江寫縑素疊嶂俯杯桮中有萬雉城鐵立不可玩伏龍
起行雨老樹舞影亂衝風挾驚電意恐崖谷斷路懸石

磴滑衆客紛駭汗嵌空偶自託發若鳥集灌須臾便開
霽杲日麗清漢卻坐山巔亭容我烏幘岸長懷付尊酒
別語不容判會須九垓外與子期汗漫

庚辰二月夜雪

夜半雨鳴廊晨起雪暗空不減臘月寒故作昨日風融
銀攤山腰飛花滿裘茸辨此了不難咳唾煩天工纖纖
園中花一夕無光容凜凜庭下松巍然兩蒼龍

張欽夫笋脯甚佳秘其方不以示人戲遣此詩

使君善食笋笋脯味勝肉秘法不肯傳閉門課私僕君
不見金谷饌客本萍蘆豪世藉此真成癡但令長須日
致饋不敢求君帳下兒

蒙和荅益竒輒復為謝

齋厨極蕭條晚食以當肉公來共蔬盤留語輒更僕平
生懲沸仍吹蘼欲了官事渠能癡何時竟作淮南歸擊
鮮校獵從盧兒

張欽夫送笋脯與方俱來復作

笋脯登吾盤可使食無肉
鮭腥辟三舍
棕枿乃臣僕
書生長有十甕虀
却笑虎頭骨相癡
得君新法也大奇
且復從游錦綳兒

勸農以湘波不動楚山碧
花壓闌干春晝長
為韻得干字

積雨已連月
長沙尚春寒
今朝定何朝
喚客來江干
問訊湘西寺
霧重江漫漫
聊須萬斛舟
渡此千尺湍
老松如相迎
翠落頭上冠
却望城中花
寶髻垂珠鬢
勤農有

故事般樂非所安薄晚會春園老稚隨馬鞍彘肩侑尊
酒呼喚來同盤從容及鄙事爾汝開心肝我是耕田夫
偶然此為官飽不知稼穡愧汝催租瘢願言各努力長
年好相看

陳仲思以太夫人高年奉祠便養卜居城東茅
屋數間澹如也移花種竹山林丘壑之勝湘州
所無食不足而樂有餘謂古之隱君子若仲思
者非耶乾道戊子六月某同張欽夫過焉裴回

彌日既莫而忘去欽夫欲專壑買鄰欽夫有詩

某次韻

平生交游中此士故耐久不折為米腰頗袖斷輪手卜
居並東郭草草宮一畝日課種樹書箋題徧窻牖花草
當姬妾松竹是朋友上堂娛偏親家飯隨野蔌客至即
舉詩興來亦沽酒清溪遶屋角高木老未朽翻翻荷見
背戢戢魚駢首幽觀天所藏勝踐我獨後不因南軒君
茲遊幾時有為君便買鄰溪南好岡阜我喜君亦狂呼

兒挈尊卣一洒塵埃曾快若苗去莠夜涼佳月出人影
散箕斗恨我當先歸君能小留否

贈陳監廟

陳子居城東茆屋三四間下有五畝園濯畦泐清灣松
栢充羽葆荷芰作髻鬟再拜太夫人壽比衡麓慳我早
與子遊期子到孔顏察子意甚真不與時輩班扁丹雘
荆渚餘子頗謗訕大道甚坦夷勿歎行路難彼自種荆
棘吾寧翦榛菅一醉乘秋風共此霜月彎

送邵懷英分魯直詩韻人間風日不到處天工

玉堂森寶書得書字

將酒澆君車問君行何如初無十萬錢但有一束書往
昔千官班渠曾綴簪裾日月九門隔江湖十年餘老榦
久凌剝寒灰費吹噓今者尺一追問津承明廬蓬萊道
家山紫極帝所居功名儻來爾步武當徐徐遙岑出疎
林淺水行游魚臨分再三囑音信莫我疎

送張定叟

戊子歲二月定叟如南山行李太忽草問君何當還敬
展南陽阡永慕涕已潛畢事却登攬紆子悲悴顏羣峯
最高處眼界窮塵寰紫蓋歛佛刹黃庭扣玄關夜榻藉
雲衲曉窗闌煙鬟野飯薦筍蕨幽尋翦榛菅酒賤可痛
飲詩成要重刪勿作賈胡留閨人賦刀環歸時買竹鼪
小破行囊慳

朱陵洞

黑雲起我趾白雨過山脚卻立朱陵洞一望紫虛閣神

丹吾已必仙臂真可握試向靜處聽空濛有笙鶴

題屏風送裴甫歸臨川

不見已四年既見還作別贈以墨竹屏况此君子節歲
月不我留玉立空山陰願言無相忘因風時寄音

送道州酒與吳伯承

陽城所臨州酒味猶清醇我病不能飲負此盎盎春髯
吳燒苦笋喚客車連軫名酒隨惡詩掀髯一笑羶

葵軒觀笋

蔡軒新笋生戢戢水蒼玉脫籜便林立爾輩殊窘束黃
梅四月雨念子亦良苦十二鳳凰鳴秋風何處聲

贈尹童子夢龍

長沙尹氏子四歲誦萬言青松一寸長歲晚當摩天終
為棟梁用莫作桷與椽斫根剗其明本瘁末亦顛持此
勸乃翁閉門養真源

一覽亭

城中十萬戶亭脚五千丈小退鴈鷺行却立雲雨上主

人心如此坐了鏡中像沙尾是我舡煙波更空曠

睡起

睡起有佳聲蕭蕭竹間雨蒿廬澹無營一榻不受暑微
颼入牖來喚起香中縷撫卷忽超然空梁走饑鼠

吳伯承送苦笋消梅用來韻各賦一篇

問訊湘西笋政得夜來雨高標諸枉直餘味良樂苦

又

脆圓供小摘不待四月雨新詩同咀嚼學子心獨苦

戲書贈蘇待問

從公覓此紙欲與蘇待問醉中墨鷁黑北風起雲陣明朝酒醒看為子傳心印子若不領畧取火燒作爐

贈震山主

震公住山年與我共壬子瓦礫化金碧願力一彈指鄉來祖師禪風定月滿天語子義第一饑餐困當眠

春盡日送間人伯卿次家君韻

早年翰墨場未見心已親筆底三峽流曾次萬卷春

試省

文字適相從未淹時欲別故惱人敢賡老仙詩索去不
在某房

用頻

洗塵贈張立之判官

立之居糟丘曾有萬斛塵歸來卧西窗涇渭自此分汗
泥生笑渠榛墟有白雲莫厭吏事煩願子清天君

王龜齡賦喜雨諸賢畢和某客行半月未嘗晴
也故於末章云

久旱一雨足高低水平分老農爾何知使君甚艱勤使

君家鴈山出作無心雲四海方立槁須君來救焚

又

客行苦淫潦道路渺不分十步九掀淖眷言僕夫勤昔
早欲訟風今雨當誅雲我已寫綠章擬向清夜焚

八桂堂池上賞蓮納涼

山月半池白水風終夜涼蛙聲作鼓吹芟製為衣裳萬
里俱遠客三人同一觴但使嶺海豐此樂未渠央

前日出城苗猶立槁今日過興安境上田水灌

輸鬱然彌望有秋可必乃知賢者之政神速如
此輒寄呈交代仲欽秘閣

筒車無停輪木規著高格稭稊接新潤草木丐餘澤府
公為霖手號令行頃刻願持一勺水敬往壽南伯

南臺

我遊衡嶽巔路半此歇脚風雷駕飛殿日月隱傑閣闌
干十萬里仰視天一握遂訪紫虛君歸時騎白鶴

書懷

七夕在衡陽九日在蘄州秋風浩如海我行尚扁舟破
帽不堪落菊花空滿頭醉眼忽瞳若悠然過滄洲

元宵同張欽夫邵懷英分韻得紅旗字

佳月妬纖雲微和扇東風聊持一杯淥共此千燈紅吾
宗延閣英聖學與天通且最治郡課遂收活國功

又

邵子坐學官今日有詔追道山萃竹帛武庫森戈旗文
武要兩有腐儒不足為明年燕端門舉酒還相思

贈盧司法

逃秦盧博士讀書不讀律江陵法曹掾移病滿百日燕
坐供佛香青燈照繩床肺熱今無恙

一本作
今好否

門前春草

長

于湖集卷五

欽定四庫全書

于湖集卷六

宋 張孝祥 撰

律詩

進芝草

廟錫珍符豈偶然靈華再見只經年祥開二室昭貽燕
根託同樞自屬聯工瑞應誠雖紹至宸衷思孝益增虔
微臣願考皇天意不獻終童效異篇

又

煌煌瑞彩映金鋪元氣回旋即此都太史連年書盛事
近臣更日奏新圖璇宮薦祉寧虛應玉葉流芳已兆符
早晚清塵款原廟臨觀敢請駐前驅

某頃蒙信陽使君教以邊字韻佳句伏讀降歎
病勸荅謝甚緩復不能竒仰俟斷削

風流追數建安年誰遣朱轡並塞邊舉國向來儒服少
是邦端有大夫賢須公帷幄收長策著我江湖刺釣舡

池閣追涼肯臨否紅粧翠蓋擁三千

又

百適歸來又一年投身烽火戍樓邊私憂自笑愚無策
制勝懸知國有賢北去燕然堪勒石西來樊口看燒舡
中州更有王夫子筆陣猶能獨掃千

子雲塵境先遣詩次韻

相風日日問長年鷁首遙知近箇邊別後情親難過我
故家人物更誰賢一尊且對荒城酒六月休牽上水舡

小此淹留待追詔公車歸奏牘三千

送劉伯同侍開府公入覲

相公早勒太常銘康樂當家更典刑
槍急曾看飛鳥過筆精時作換鵝經
極知許國心常赤趁取封侯鬢尚青
若到都城見知舊為言江漢有浮萍

謝元封
康樂公

送子雲倅荊州

閱世波流險未涯愛君惻惻靜無華
高門自惜聯三戟飛珮何當乞九霞
喬木世臣餘故國采蘋齊女甚宜家

君王早晚思前席會有徵書訪賈嘉

又

荆吳相望各天涯惜別尊前菊未華便放扁舟衝駭浪
要看秋日冠輕霞新詩滿路分吾子盛業康時是故家
好去依劉靜邊瑣策勲行即賜褒嘉

枕上聞雪呈趙郭二丈

上瑞來寧玉座憂夜聲先到竹窓幽饑腸已作來年飽
病眼聊須臆月收高士清貧無弊履故人狂興阻扁舟

却思清曠江邊路鶉兔成車酒自筭

湖上晚歸遇雨

陰雲靄靄草萋萋晚過東湖雨濕衣細柳含煙凝翠色
浮鷗戲水弄晴暉輕舟繫纜斜依岸釣子收綸欲下磯
湖上人家未扃戶兒童蓑笠負薪歸

雨入廬山

夢想匡廬一段奇經行那得雨追

一本作相

隨晴來見說山

逾好勝處如今我自知虛室真人珠咳唾卽庵老子白

鬚眉並游三士風流甚袖手傍觀定有詩

清虛真人皇甫坦東林長

老道顏俱在山中

再和

借

一本作帶

雨尋山故自奇幕中佳客肯相隨清游端拜使

君賜此樂詎容兒輩知暗谷水來鳴雜佩遠峯煙斷出
修眉庾樓百尺江千里遙憶憑高政索詩

郡侯遣騎至山中餽名醞輒呈長句用黃宰韻

山南山北雨生寒竹樹風煙蒼莽間青壁倚天元未見

白衣送酒故相關共追蓮社公應許穩上籃輿我欲還
後日重來拚一月細扶藜杖覓孱顏

去年正月三日雪霽入昭亭訪應庵如庵二老
今年在臨川追懷昔游用寄卍庵韻

蹇驢衝

一本作踏

雪度松林齧

一本作漱

石溪流有令音旋摘白

雲濡燥吻更參黃蘗印初心嵐開複嶺雲千疊凍合浮
圖玉數尋一夢經年歸去好官情全薄此情深

卍庵自東林欲還蜀某以報恩招之大人賦詩

勸請再次韻

憶携拄杖過東林
掣電轟雷聽法音
青壁倚天元滿眼
白雲出岫本無心
我眉江嶮公無度
法眼泉清我欲尋
手種庭前栢樹子
孤根應比鄉來深

用韻簡天童應庵

敬亭松竹古叢林
二老風流舊賞音
樓閣長開太平象
鐘魚能洗祖師心
別來黃鵠還千里
盟在白鷗當再尋
却憶西堂大言客
只今高坐海雲深

奉陪宣守任使君謁昭亭神祠

緩驅千騎出朝京

名門

喚得春回眼界青
旗脚靈風來廟

步馬蹄山雪過昭亭
極知太守懷忠款
端為君王薦德馨
慚愧去年冬十月
軍書徹夜聽鳴鈴

又

豐年已卜稻如京
雪盡春從草際青
竹裏紅旗行點點
松間白塔見亭亭
暖回宿夢開寒色
風約疎梅度晚馨
却憶宣城李太白
也將詩句掣齋鈴

太白詩云昨日方為宣城客掣鈴夾

通二
千石

任守作醮為民祈福先期而雪是日開霽

紫府仙人自列真綠章封事更通神清塵已作連宵雪
不夜潛回萬屋春玉節朱幡來浩蕩雲車風馬正紛綸
步虛聲徹朝元路便挈荷囊款帝闈

應庵退席蔣山來寄昭亭萬壽三請不得已而
去輒贈長句兼簡蘇州內翰尚書

逍遙丘壑欲忘年忽作風蟬蛻骨仙鍾阜恰從三昧起

靈一本作雲巖重要一燈傳極知掃迹終無策且與臨岐快

着鞭莫作山林城市想從來大隱故居廬

又

不寄音書又隔年因師問訊玉堂仙碧油早覺儒為貴
青海應無箭可傳憶昔絲綸催喚仗何時沙路聽鳴鞭
生涯落寞公知否準擬松江受一廛

辛巳冬間德音

帳殿稱觴送喜頻德音借與萬方春指揮中夏無遺策

開闔乾坤有至神
南斗夜纏龍虎氣
北風朝蕩霧煙塵
明年玉燭王正月
擬上梁園奉貢珍

又

韃靼奚家款附多
王師直到白溝河
守江諸將遙分閫
絕漠殘軍競倒戈
翠蹕春行天動色
牙檣宵濟海無波
小儒不得參戎事
賸賦新詩續雅歌

和曾裘父韻送老人赴鎮九江

邊箭收聲江不波
廬山高處與天摩
向來只作青鞋計

此去無如紫詔何塵滿庾樓煩翦拂經餘蓮社更摩挲
文成本自籌帷幄不數黥彭戰伐多

上丁齋宿

青衿陪祀憶初年老矣齋居重慨然俎豆不知鵝鸛事
牲牢空薦豕牛羶北來迷霧車連野東去乘槎浪接天
汲汲兩宮常旰食受牐歸去淚如川

和揔得居士康樂亭韻

尚憶池塘夢阿連當時此意惜無傳薪車不障洪河決

喬木終隨故國顛
柳下煨工真得道
竹林酒友謾稱賢
先生義槩雲天薄
千載參渠活句禪

寄張真父舍人

玉珮瓊琚出近班
仙槎從此到人間
聊須海內無雙士
往鎮坤維百二關
御府應留霜簡看
鄉人休羨錦衣還
嗚呼國步艱危日
補袞懸知欠仲山

又

投分平生不數人
憶陪文館笑談新
資中宰樹看成拱

荆府詩筒迹又陳已恨別離空歲月那知解后亦參辰
古來命駕須千里薄宦區區愧此身

中秋觀月齋雲樓用孫昌符韻

玉宇無塵夜氣清銀河徹底素波明人應好月同千里
身在高樓近

一本作接

五城丹桂定知連我老綠尊何惜為

君傾建章鵲當年夢便欲憑空上玉京

題魯如晦通隱

先生早結社中蓮覆錦憑熊亦偶然不向江湖忘魏闕

故應山澤有儒仙十洲便著登瀛士三徑難留避世賢
我亦經營一丘壑問公先乞小壺天

同胡邦衡夜直

慕用高名二十年敢期丹地接周旋先生義與雲天薄
老去心如鐵石堅夢了瓊崖身益壯煙銷金塢臭空傳
一尊莫惜空相屬宮漏穿花夜色鮮

一作月滿天

雪晴成五十六字

鳥鳥聲樂作初晴日到南窓氣象新天接瓊瑤三萬頃

樹明組練五千人已從炎海消陰翳更與神輿洗戰塵
曾侍嚴宸知帝力隆興借與萬方春

將如會稽寄曾吉甫

起居一代文章老闕寄音書恰二年詩債未還緣懶拙
宦游如此竟危顛會稽舊有探書穴賀監應尋戴酒舡
我欲從公留十日問公乞句手親編

過昭亭哭二弟墓

陌上春風久矣歸墓頭衰草正迷離白頭未杖三年淚

黃壤長埋短世悲憶昔追游常並轡只今獨往更題詩
兩兒二弟俱冥漠顧影伶俜欲語誰

贈邕州滕使君

千騎東方白玉鑣十眉環坐紫檀槽安南都護來鼇禁
建武將軍握豹韜瘴雨蠻煙驚鼓角朔雲邊雪滿旌旄
夕烽不到甘泉殿尺一徵還近赭袍

于湖集卷六

欽定四庫全書

于湖集卷七

宋 張孝祥 撰

律詩

齊山

江山平遠三千里水石嵌空二百巖地闢天開成洞府
峯回路轉有精藍九華卻立纔堪倚萬井橫陳我所監
欲賦齊山無傑句夢中危壁尚巉巖

一本作提
筆尚巉巖

夜讀五公楚東酬唱輒書其後呈龜齡

同是清都紫府仙帝教彈壓楚山川
星躔錯落珠連緯
嶽鎮峩嵒柱倚天宮羽在縣金奏合驂騑參隊寶花鮮
平生我亦詩成癖却悔來遲不與編

薦福觀何卿麒麟壁間詩對之悵然次前韻

金華老子定臈仙翰墨文章徧兩川
遺跡已驚風落木
高名依舊日行天人間易得朱顏老寺壁空懸玉唾鮮
欲繼三賢歌薤露嚴詩杜集儻同編

再用韻作五公詩

公如韓子定飛仙更喜門人老玉川莫厭詩筒頻度嶺
即看侯弁去朝天飛龍位正雲霄近集鳳樓高采色鮮
我欲扁舟君記否但教歸去雜民編

蒙侍御史再用韻作送行詩走筆和荅迫放舡
不暇工也

憶曾總領道山仙自挽狂瀾制百川廷策萬言功蓋世
臺評三上力回天楚東賸喜詩郵速天北催頒詔墨鮮

老我江湖堪野史看公勲業手親編

龜齡携具同景廬嘉叟餞別於薦福即席再用

韻賦四客詩

使君領客訪金仙小隊旌旗錦一川我欲采芝非辟世
公當立極要擎天詩聲政爾容傳藁僧律何嘗禁割鮮
一笑番陽逢歲熟問公鐘磬幾時編

登清音堂其下琵琶洲也再用韻

夜橫霜竹夢遊仙曉到餘干月滿川山遶樓臺欲無地

水環洲渚更連天明霞一抹朱絃直芳草分垂綠綬鮮
却憶洞庭張樂地石鐘浮磬定同編

餘干趙公頤賢宗室也魏公題其堂曰養正且
為作銘取易頤之義刻碑堂上予過之為賦詩
眼裏紛紛不要同從教三徑滿蒿蓬肯來與子談周易
此去何人識魏公家近星辰雙闕北身居烟浪五湖東
清臺有日占雲氣一丈豐碑夜貫虹

雞籠福地在厯陽將至豐城望一山宛然感之

賦詩

黃茅白葦徑才通忽見晴嵐掃翠空
從吏只今俱殫力仙山何許是雞籠
逢人漸覺交游少問路仍行盜賊中
自是麤才合麤使使瘴鄉那得便途窮

午憩道傍人家

一壠人家竹樹涼午陰深處看胡床
石泉政似煮茗沸稻花已作炊秔香
夢到家園歸自好起尋官路去何長
塵埃滿面迎西日底處青山是故鄉

入清江界地名九段田沃壤百里黃雲際天他處未有也

野水瀾漫欲漲川稻雲烘日更連天定無適粵千金橐可買臨江九段田黃犢眠邊高樹蔭白雞啼處遠炊烟此中若許投簪紱便老耜耰卜數椽

題吳城廟

乞得東歸一信風敬持牲酒扣靈宮千尋石甃蒼藤合百歲神倉赤甍空

廟有神倉每遇覆舟則赤氣起

浥浥午陰移岸樹蕭

蕭涼意滿舡篷杖藜更作僧坊去借壁題詩却未工

呈樞密劉恭父

鼎席方虛望已隆上游那得更煩公敢言兩鎮成交契
自是孤根累化工舊弼新開元帥府閑官且領太平宮
歸家淨洗如椽筆凝準燕然勒駿功

子功補之遠送海錯甚珍

白晁烏羊見未曾青蛇赤蟻當常珍忽驚海物來登坐
能致南烹有故人萬里漂流憐逐食百年麤糲愧嘗新

新篳恰趁來時熟細酌梅花雪片春

張仲欽朝陽亭

亭在建康

便合朝陽作鳳鳴江亭聊此駐修程南瞻御路臨雙闕
東望仙家接五城日上白門兵氣靜春歸淮浦暗潮平
遙憐幕府文書省時下滄浪自濯纓

次韻

明年余為桂州仲欽以常參官十六人薦為廣西
提點刑獄公事又明年余罷去仲欽直秘閣寔代

余蓋仲欽常遊朝陽巖而樂之於余之行也仲欽
置酒巖上諸侯賓客咸集顧不可以無語乃賡建
康之詩以記余與仲欽事契如此為嶺表異日雄
觀云

空巖相望一牛鳴不要郵籤報水程天接海光通外徼
地連江勢挾重城絲綸疊至龍恩重繡斧前驅蜚霧平
鳳閣鸞臺有虛位請君從此振朝纓

又

饑腸得酒作雷鳴
痛飲狂歌不自程
坐上波瀾生健筆
歸來鐘鼓動嚴城
不應此地淹鴻業
盍與吾君致太平
伏櫪壯心猶未已
須君為我請長纓

送張司戶還蜀

似向川人有夙緣
交游存歿最多賢
今年初識張公子
六月還尋上水舩
萬里親庭心已到
一杯別酒憶空傳
西行勝有新詩句
寄我應書十樣牋

和仲彌性煙霏佳句兼簡貳車

收歛經綸寄一麾戲分風月與煙霏醉餘綵筆三千首
老去蒼官四十圍露菊溥秋催落帽蠟花推夜照更衣
登臨縱好難留滯白髮雙親待汝歸

又

引手星辰逼太微盪胸雲物散空霏莫山好處青成紫
秋月明時雪打圍竹洗佳人千點淚荷翻仙子六銖衣
西巖定有漁翁宿障雨攔風不肯歸

庾樓和林黃中韻

九月扁舟下水風一尊佳處與君同眼高四海氛塵外
詩在千山紫翠中傾坐只驚談麈白踏筵不怕舞衫紅
樓頭今古無窮事醉倚胡床月滿空

高遠亭和林黃中韻

簷桷飛翔入太空下窺廬嶽最高峯亭如峴首應遺愛
詩比西湖欲亢宗天上喚君從此近酒邊着我幾時重
憑闌欲去仍回首誰與佳名自點胷

與同僚十五人謝晴東明得淵字

靈光便滿恒沙界大士重來七十年秋入郊原成樂歲
風隨簫鼓散香煙定知蠻獠安三窟更遣蛟龍閱九淵
太守憂民但逃責所忻畢至有羣賢

釋奠

又領諸儒歎泮宮車書同處禮應同栢庭老影留江月
竹屋寒聲作社風坐客語殘香一穗候人催起鼓三通
歸來稅冕仍分肉更覺休官興未窮

風雨石首呈同行寄荊州僚舊

昨日離筵酒未醒
今朝風雨暗江亭
近人積水春全綠
隔岸荒山夜却青
野吏衣冠行木偶
客舡燈火散疎星
寬程且作三旬約
要看廬山紫翠屏

江行再用前韻

澤畔行吟我獨醒
歸程不計短長亭
西風送浪頭頭白
芳草隨人段段青
昨夜疎篷猶窘雨
今朝嚴鼓欲侵星
無人去喚華容宰
畫我江行作小屏

次韻黃子餘

縮肩得句極酸寒何似黃郎咳唾間
少日曾經諸老學
傳家自有祖師關
詞林根柢今誰在
振古風流要力還
我老故應無用此
因君猶欲更晞顏

去臨川書西津漁家

作客臨川又一年
却尋歸路淺灘舡
宦游到處真聊爾
別恨何須更黯然
夾道長紅慚父老
繞城濃碧記山川
無端此地成留滯
定自從渠有宿緣

將至池陽呈魯使君

珍重池陽魯使君
忘年交契獨情親
江山佳處公開府
風雨來時我問津
翠逼筍輿松徑合
綠隨秧馬稻畦新
東歸賸作登臨好
病怯詩腸故惱人

上元設醮畢作長句

綠簡朱書自叩真
覆爐香霧晚網緼
雪花便作茶花白
春色還隨月色新
江漲不憂堤萬丈
年豐何啻粟千囷
微生只擬休官去
拜昨歸來吉夢頻

齊安郡夫人挽章

錢長主之孫女
楊子寬之內子

儲祥吳越王家子
婉德蓬萊閣上仙
湯沐幾年開大國
笄珈長夜拚窮泉
鸞臺曉月悲塵鏡
鳳軫春風泣斷絃
木落茲枯何限恨
藁砧賦悼亡篇

于湖集卷七